

Aeropuerto di Aruba a ricibi nan prome AHATA Impact Award

ARUBA Airport Authority N.V. (AAA) ta masha orguyoso pa anuncia cu nan a ricibi nan prome AHATA Impact Award den e categoria di ‘Inversion Social’, como reconocimiento pa e esfuerzonan sobresaliente di responsabilidad social corporativo pa cu e comunidad local. AAA tambe a haya mencion honorabel den e categoria ‘Conservacion di Medio Ambiente’.

Diabierna 27 di juni 2025, a invita AAA pa e di 3 AHATA Impact Awards cu a celebra e companianan cu ta haciendo un diferencia duradero na Aruba pa medio di iniciativanan impactante.

A nomina AAA den tres categoria:

- Conservacion di Medio Ambiente
- Inversion social
- Bienestar di empleado

E categoria di ‘Inversion Social’ ta destaca e programanan cu ta atende e necesidadnan critico di comunidad manera pobreza, educacion, cuido di hende grandi y mas, sea pa medio di tempo voluntario of sea ta via sosten financiero.

E team di proyecto di asistencia social di AAA “Wings of Hope (WoH)” a cuminsa den e unidad di seguridad di AAA y tabata e base pa inicia cu un programa basa riba proyecto na escala mas grandi adopta pa henter e compania cu e unico proposito di yuda y sostene e famianan den necesidad, WoH den colaboracion cu Directie Sociale Zaken (DSZ) ta trahando diligentemente pa 5 aña caba y a contribui na un averahe di 50 pa 60 famia anualmente cu un inversion mas o menos di 148.500,00 florin pa aña. Durante henter e añanan te cu aña 2024, WoH a ehecuta cu exito un total di 31 proyecto socialmente responsabel pa e comunidad local, cu un contribucion promedio total di 270.000,00 florin pa aña.

Pa aña 2025, AAA ya a planea y lansa ocho proyecto nobo, aline cu e Metanan di Desaroyo Sostenibel di Nacionnan Uni (UN SDG), especificamente:

- Cero hamber (2)
- Bon salud y bienestar (3)
- Educacion di calidad (4)
- Igualdad di genero (5)
- Energia pagabel y limpi (7)
- Desigualdadnan reduci (10)
- Ciudad y comunidadnan sostenibel (11)
- Paz, husticia y institucionnan fuerte (16)
- y Asociacionnan (17)

Adicionalmente, Wings of Hope ta conta cu un portal di



donacion, cu ta permiti e organisacionnan/ fundacionnan registra pa entrega un plan di proyecto basa riba e “AAA’s Donation Policy” y esunnan di SDG di Nacionnan Uni.

“Wings of Hope” tabata instrumental pa e moral di e compania den e prome lunanan di e pandemia di Covid y te dia di awe e ta sigui ta un fuente di orguyo pa e empleadonan di AAA segun cu nos ta sigui amplia e alcance y e impacto positivo di e proyectonan di WoH. Duna bek y contribui na un manera positivo y duradero na e comunidad cu nos ta sirbi a bira parti di e DNA di AAA y mi no por ta mas orguyoso di e team di Wings of Hope y henter AAA pa esaki,” asina Angeline Flemming, Director di Health and Sustainability, a expresa.